

Date – 23/01/2026

Time - 18:30 -18:40Hrs

AKASHVANI AIZAWL

HEADLINES (EVENING)

- 1. Mizoram Education Reforms Committee chuan sikul kum thar 2027-2028 ah School kal hun chhung atan January - December hman a rel.
- 2. National Girl Child Day chu vawiin khan Mizoram hmun hrang hrangah hman a ni.
- 3. Prime Minister Narendra Modia chuan vawiin khan Kerala-a Thiruvananthapuram ah hmasawwna project hrang hrang leh rel service thar a hawng.
- 4. Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn.

<><><>

EDUCATION REFORMS

Mizoram Education Reforms Committee (MERC) vawi 14-na vawiin khan Education Minister leh MERC Chairman Dr Vanlalhlana kaihhruaiin an thukhawm a.

An thurel zingah School kal hun chhung atan January to December (calendar year) chu Pawl 1 aṭanga Pawl 10 inkar tan hman a ni ang a, Pawl 10 exam erawh chu a pangngaiin a kal ang a. He academic session thar hi 2027-2028 session aṭanga hman ṭan tura ruahman a ni.

School uniform chu School tinin zalenna neiin an duh an thlang thei ang a, School kai ṭan hun chu tuna hman lai mek hi hman chhunzawm a ni ang.

Hindi zirna tih hmasawwna atan hmalakna hmasaah zirtirtu thawk laite tana training changtlung tak buatsaih a ni ang a. Zirlaiten pawl hniam zawk aṭanga Hindi an thiam nal theihna atan ruahmanna siam niin, a kimchang chu hun remchang hmasa berah puan chhuah a ni ang.

Heng bakah hian MERC meeting chuan 2026 HSLC leh HSSLC board examination result buah top 10, subject topper leh division tar lan ṭhin chu tih tawp a rel a. English Medium School-te tan 'mahni ṭawng hman ni' chu kar khatah ni khat siam ni se a ti a. A ni chu school-in an remchan ni ber an thlang thei ang.

<><><>

PARTY PR ON LENGPUI AREA

Sihphir leh Lengpui chhehvel ram lei chungchang sorkarin a hriatpui lova, DC levela tihfel ni anga sawi chu thudiklo a ni tih MNF leh Congress Party ten an sawi.

MNF Gen Hqr Adviser Rajya Sabha MP Pu K.Vanlalvenan ZPM MLA pakhatin, Sihphir leh Lengpui chhehvel ram lei chungchang sorkarin a hriatpui lova, DC levela tihfel anih thu a sawi chu thudiklo a ni a, Party office chu dawt sawina hmun tur a ni lova, thu belhchian dawlo hmanga mipui rilru hruaisualna hmun tur a ni heklo, a ti. Sihphir leh Lengpui airport chhehvel ram hmanhmawh taka lei nia sawi chungchangah India Defence ministry in mimal kut atangin ram a lei lova, Mizoram sorkar kut atangin IAF in ram a lei a ni zawk tih vawiin khan Mizo Hnam Run chhung inkhawmah a sawi.

MP chuan May ni 15, 2025 ah sorkarin heng ram Lengpui leh Sihphir amite hi arukin Award for Acquisition a chhuah vek niin a sawi a, chuvangin ZPM sorkar hian midang a puh thiango a, Lok Sabha MP nilai hi Parliament standing committee on Defence ah member anih avangin a hriat ve ngei tur niin a lang a. A hrelo anih chuan a lungawiloh hle a rinawm, a ti.

Sorkar hmalakna chu minister handwriting hmanga ziaak a ni ngai lova, sorkar officer te hminga ziaak a ni thin. Act 213 hmangin sorkarin ram a lei thin a, dan anga chanchinbua chhuah tur anih laiin ram neitu diktak ten an hreve silo chu thil mak a ni, a ti a. Thildiklo inphum a awm ngei tih leh dan bawhchhhatna a awm tih a chiang a. Thudik hailang turin theihtawp chhuah a tum thu leh a hre tur ten an hriat ngei theih nan auchhuahpui a tum tih a sawi a ni.

MPCC Sr Vice President Pu Lalnunmawia Chuaungo chuan Adviser to Chief Minister in MNF sawrkar laia tih fel vek a ni tawh a, DC level ah tih fel a ni a, an hriatpui lo tia a sawi chu CM leh sawrkar hotu lawk ten an hriatpui a, thudiklo a ni a ti. Dan bawhchhhatna tam tak a awm a, dan an palzut vek a ti bawk.

Pu Lalnunmawia chuan Lengpui Airport bula ram lei chungchangah hian MNF ho khan thil tenawm tak tih tumin hma an la a, sum vaibelchhe tam tak ei tumin thil an kalpui a. Mahse official a an kalpui thui hma in an sawrkar kha a tlak tak avangin an tifel hman ta lova.

ZPM an sawrkar a, February ni 21, 2025 khan Chief Minister Pu Lalduhoma hian compensation tam uchuak tak pek tumna a awm avangin Lengpui Airport bul ram inleina chu a titawp rih a, 'Abeyance' ah an dah tih a sawi a, mahse Abeyance ah an dah tak tak lo nge ni, Henry-a te an che a, May ni 25, 2025 khan ram inleina tur notification an ti chhuak leh ta si a ni a ti.

He ram in leina ah hian Land Aquisition Process mumal taka kalpui a ni lova, mipui a nghawng dan tur, social impact tur pawh zirchian a ni lova, hmanhmawh taka kalpui a ni. July ni 24 ah khan ram inleina an tifel vek hman a, ram lak dan tur kal hmang anga kalpui a ni lova, dan pawh an bawhchhe vek a ni a ti.



NATIONAL GIRL CHILD DAY

National Girl Child Day chu vawiin khan Mizoram hmun hrang hrangah hman a ni a,

Women & Child Development leh 3rd Battalion M.A.P te buatsaihin vawiin khan 3rd Battalion M.A.P Roll Call Ground-ah hman a ni a. Home Minister Pu K. Sapdangan a hmanpui.

He hunah hian National Girl Child Day puala Thutiam chhiar rualna neiin Hmeichhe naupang kawng hrang hranga hlawhtlinna, khawvel huap leh ram pum huapa langpha te chawimawina hun hman a ni a, an vaiin hmeichhe naupang 22 hnenah chawimawina hlan niin, Sports lamah te, zai lamah leh lehkhabu ziak lama midangte hma hruaitu te an ni.

Champhaiah chuan Women & Child Development huaihawtin Govt. Champhai College-ah National Girl Child Day hman a ni a.

Kum tina an lo tih thin angin hemi ni pual hian hmeichhe naupang chawimawi phu: Girl Champion R Lalrinhlui Vengsang Karate a State leh National Level a Gold Medal 10, Silver 5 leh Bronze Medal 5, State Karate Championship Gold Medalist a ni bawk. C Lalremkimi Zion Veng AMKA State Karate Champhionship Gold Medalist, Champhai ti hmingthatute hnenah chawimawina a hlan a ni.

Lawngtlaiah 'National Girl Child Day 2026' lawmna leh '100 days Awareness Campaign on Prohibition of Child Marriage Act' khuhhawna neih a ni a. Lawngtlai Bawrhsap Pu Donny Lalruatsangan a hmanpui.

He hun hmannaah hian 'Prohibition of Child Marriage Act' chungchang sawifiahna leh zirtirna a nei a ni.



CYMA

Central YMA Road Monitoring Committee Member te chuan vawiin khan Durtlang - Zanlawn BRTF kawng siam mek chu Lungdai Khawtlang atanga sawiselna an dawn avangin a hmunah an enfiah a, BRTF leh Contractor te'n Lungdai area-a an hnathawh tawh zawng zawng chu nawr khawk leh vek a, siamtha leh turin ruahmanna an siampui nghal a ni.

Kawng siam mek hi Lungdai khawtlang - Village Council, YMA leh NGO dang ten a hmunah nitin an vil chungin, kawng siamtute hian tha tawh turin an thawk lo niin an hria a. An lungawi lohna hrang hrang te chu, Central YMA Road Monitoring Committee hnenah an lo thlen a, BRTF leh a Contractor aiawh te chu koh niin, duhthusama thaa hnathawk chhunzawm turin an hrih.

CYMA Road Monitoring Team hian Kawng siam chhunzawmna tûr Bitumen Concrete (BC) truck trip 3 chu a daih tawh avangin a hman tlak tawh loh avangin paih vek turin an ti a, an kawng siam tawh sa chu Sealcoating ti leh vek turin an ti bawk.



PHE

PHE Dept leh Central YMA chuan tuihna humhalh leh a awmsa tih pun kawnga hmala turin kum 2 dang thawkdun leh turin thuthlung an ziaik leh a,

Tuihna humhalh leh a awmsa tih pun kawnga hmalah hi thupuih neiin Kum 2012-2025 chhung thawh dunna hlawhtling tak hman a ni tawh a. Kum 2017-2025 chhung hian fai leh thianghlim inzirtirna chungchangah thawh dunna hlawhtling tak hman a ni tawh bawk.

He thawh dunna hian thil tum pahnih neiin, tuihna humhalh leh a awmsa tihpun leh faina leh fai duhna thinlung nena changkanna lamtluang zawh an tum a ni.

He thawh dunna thuthlung hi PHE Engineer – in – Chief Pi Zodintharileh Pu Central YMA Pu R. Lalngheta ten an ziaik a ni.

<><><>

MIZORAM TOPS REGIONAL SKILL COMPETITION

Ministry of Skill Development & Entrepreneuership buatsaih, India Skills Northeast Regional Competition 2025-26, Guwahati University-a neih zawh takah Mizoram team chuan Gold medal 9, Silver medal 3, Bronze medal 3 leh Medallion for Excellence 6 lain hmar chhak state-ah an champion.

Regional Skill Competition hi January ni 19 atanga ni 22inkarah Guwahati University-a neih a ni a, Trade hrang hrang inelna 26- awmin, Mizoram Team-te hian trade 20 ah inelna hmachhawnin hlawhtlinna ropui tak an rawn thlen a ni.

He Regional Skill Competition hi hmarchhak state hrang hrangte thiamna leh kutchhuak fiahna hmunpui a ni a. Mizoram team-te hlawhtlinna hian Mizoram thalaite kutchhuak leh thiamna chu hmarchhak state-ah chauh ni lo, ram pum huap pawhin a sang hle tih a nemnghet a ni.

Mizoram aiawhtute hi LESDE Department-in nikum December 8 atanga ni 12 chhunga Mizoram Skills Competition a buatsaih kaltlanga thlan an ni a. Northeast Regional Skills Competition-a Gold leh Silver la te hian India Skills Competition, National Level-ah Northeast Region ai an awh anga, an tih that dan a zirin ‘World Skills Competition’ leh ‘Asian Skill competition’-ah India ai an awh ang.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan Kerala-a Thiruvananthapuram ah hmasawnna project hrang hrang leh rel service thar a hawng. Pu Modia hian PM SVANidhi Credit Card tlangzarhin PM SVANidhi loan mi nuai khat hnenah a pechuak bawk a. Amrit Bharat Express rel pathum leh khualzin phur rel pangngai service tur pakhat a vailiam bawk. Hei bakah hian Pu Modia hian CSIR-NIIST Innovation, Technology and Entrepreneurship Hub leh Radiosurgery Centre at the Sree Chitra Tirunal Institute for Medical Sciences and Technology dinna tur lungphum a phum bawk a ni. Thusawiin Pu Modia chuan Viksit Bharat ti hlawhtling turin rampum huapin theihtawpa tan lak a ni a ti a. Khawpui liante chu a hlawhtlinna tura pawimawh tak an nih thu a sawi a. Sawrkar laipui chuan kum 11 kalta chhungin khawpui liana hmasawnna ruhrel din turin sum tam tak a seng tih a sawi bawk a ni.

<><><>

UKRAINE, US & RUSSIA TALK

Ukranian President Volodymyr Zelensky chuan Ukraine, United States leh Russia te chu UAE ah vawiin leh naktukah hian an inbe dawn a ti. Kum 2022-a ram pahnih inkara innghirnghona a awm hnua a ruala ram pathumte hi an inbiak leh hmasak ber tur a ni a. Davos-a World Economic Forum neih mekah President Zelensky leh Donald Trump te an inkawm hnua he inbiakna hi neih anih tur thu a puang a. Russian President Vladimir Putina pawhin US Special Presidential Envoy Steve Witkoff leh sumdawng Jared Kushner te Moscow khawpuiah a kawm bawk a ni,.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 129-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>